

Bantu salur salah laku peniaga



PENGUAT kuasa KPDNHEP memeriksa telur yang tidak diletakkan tanda harga. FOTO Ihsan KPDNHEP.

Ramli Ibrahim
am@hmetro.com.my

PENGGUNA perlu menyalurkan maklumat jika melihat salah laku peniaga sepanjang Perintah Kawalan Pergerakan (PKP) dan Ramadan ini termasuk tidak meletakkan tanda harga.

Nasihat itu dikeluarkan Kementerian Perdagangan Dalam Negeri dan Hal Ehwal Pengguna (KPDNHEP) Cawangan Gua Musang untuk membantu penguatkuasaan.

Ketua Pegawai Penguat Kuasanya Mohd Koma Shapii berkata, aduan boleh disalurkan ke talian 09-9120020 atau e-Aduan KPDNHEP.

"Selain itu, pemeriksaan mengejut turut diadakan bagi memastikan peniaga patuh. Mereka yang ingkar akan terus diambil tindakan seperti dalam pemeriksaan hari ini.

"Seorang peniaga di Lojing tidak meletakkan tanda harga bagi penjualan telur yang menyebabkan dia dikompaun RM1,000," katanya ketika dihubungi.

Menurutnya, tindakan itu diambil mengikut Perintah 3 (1) Perintah Kawalan Harga (Penandaan Harga Oleh Peruncit) 1993 dan Peraturan-peraturan kawalan 1974.

Beliau mengingatkan peniaga tidak mengambil mudah peraturan ditetapkan dan pihaknya tidak berkompromi terhadap mana-mana pihak yang melakukan kesalahan.

<https://www.hmetro.com.my/mutakhir/2020/04/570516/bantu-salur-salah-laku-peniaga>

Artikel ini disiarkan pada : Khamis, 23 April 2020 @ 7:33 PM

